

आकाशवाणी

खास-खास खबरां:-

1. केन्द्र सरकारै पाईप राहें PNG कनेक्शन घर-घर पुजाने दी योजना गी मंजूरी देई दिती ऐ।
2. म्तेहानें सरबन्धी राश्ट्री एजेंसी NTA ने अपनी टीम च शामिल 600 विशेषज्ञें गी हटाइयै नमें माहिरें-विशेषज्ञें गी शामिल कीता ऐ।
3. झारखंड सरकार ने अनियमितताएं दे चलदे रद्द कीते गेदे 44 भर्थी म्तेहानें दी सूची जारी कीती ऐ।
4. दिल्ली सरकार दी भ्रष्टाचार निरोधक शाख-ACB ने साबका मंत्री सत्येंद्र जैन ते IAS अधिकारी उदित प्रकाश गी दिल्ली जल बोर्ड दे टेंडर मामले च गिरफ्तार कीता ऐ।
5. संयुक्त अरब अमीरात ने इलाके च बधदी तनोतनी ते इलाकाई ते अंतर्राष्ट्री सुरक्षा लेई खतरे गी दिक्खदे होई ईरान दे कन्नै हर चाल्ली दे बपारिक लैन-देन गी स्थगित करी दिता ऐ।
6. नीदरलैंड च जारी मर्दे दे हॉकी विश्व कप दे पूल-डी च अज्ज भारत दा मुकाबला पाकिस्तान कन्नै होग।

<><><><><><>

Govt. PNG Connection

केन्द्र सरकार ने पाइप राहें PNG कनेक्शन घर-घर पुजाने लेई इक योजना गी मंजूरी देई दिती ऐ। एहदा मकसद साफ, सुरक्षित ते सस्ती रसोई गैस उपलब्ध कराना ऐ। एह

योजना अगले म्हीने दी पैहली तरीक थमां 6एं-6एं म्हीनें लेई द'उं चरणें च लागू कीती जाहग। पेट्रोलियम ते कुदरती गैस मंत्रालय ने आखेआ ऐ जे इस योजना दा मकसद मते कोला मते परोआरें तगर पाइप आहली रसोई गैस पुजाना ऐ। फिलहाल, देशें च 1 करोड़ 74 लक्ख घरेलू पीएनजी कनेक्शन न।

<><><><><><>

India Rating

इंडिया रेटिंग्स एंड रिसर्च ने चालू माली बरें दरान देशें दी अर्थबवस्था लेई सकल घरेलू उत्पाद यानी जी.डी.पी दी विकास दर 6.8 फीसद रौहने दा अंदाजा जताया ऐ। हालांकि, एजेंसी ने इब्बी आखेआ ऐ जे अल नीनो ते भौगोलिक-राजनीतिक चुनौतियें करी आर्थिक रफ्तार मट्ठी बी पेई सकदी ऐ। राष्ट्रीय सांख्यिकी दफ्तरें माली बरें 2026 च विकास दर 7.6 फीसद रौहने दी मेद बुज्झी ऐ। एजेंसी ने माली बरें 2027 लेई कच्चे तेल दी कीमत दा अपना बेसलाइन अनुमान 10 डॉलर घटाइयै 85 डॉलर प्रति बैरल करी दिता ऐ।

<><><><><><>

Fin Min RRB

खजाना मंत्रालय ने आखेआ ऐ जे क्षेत्रीय ग्रामीण बैंकें माली बरें 2025-26 च दोआर देने दे मामले च जबरदस्त बाद्दा दर्ज कीता ऐ। हालांकि, क्षेत्रीय ग्रामीण बैंकें दे कुल बकाया दोआर च 2024-25 दे मुकाबले, 10.3 फीसद दा बाद्दा बी होआ ऐ जेहड़ा 2025-26 च 5 लक्ख 78 ज्हार करोड़ रुपें शा मते दा हा। खजाना मंत्रालय मूजब,

क्षेत्रीय ग्रामीण बैंकें सबनें शा मते दोआर, राई-बाई ते ओहदे'नै जुड़े दे कारोबार लेई दिते न।

<><><><><><>

NTA Revamp

म्तेहानें सरबन्धी राश्ट्री एजेंसी NTA ने अपनी टीम च शामिल 600 विशेषज्ञें गी हटाइयै नमें माहिरे-विशेषज्ञें गी शामिल कीता ऐ। सोशल मीडिय दी इक पोस्ट च शिक्षा मंत्रालय ने आखेआ ऐ जे सोआलें आले पर्चे दी बरीकी कन्नै जांच लेई चंऊ सतहें आली प्रणाली लागू कीती जाहग। एहदे इलावा NTA दे दफतरें दी सुरक्षा लेई CISF दी सेवा बी लैती जाहग। NTA ने एह फैसला शिक्षा मंत्री प्रल्हाद जोशी हुंदे निर्देशें दे बाद लैता ऐ- जिंदे च म्तेहानें गी बवस्थित ढंग्गै नै करोआने लेई सब्बे लोड़चदे हीले जकीनी बनाने गितै आखेआ गेआ हा।

<><><><><><>

Jharkhand

झारखंड सरकार ने अनियमितताएं दे चलदे रद्द कीते गेदे 44 भर्थी म्तेहानें दी सूची जारी कीती ऐ। इंदे च बरे 2014 थमां झारखंड लोक सेवा आयोग, ते आउटसोर्स एजेंसी टी.एस.आर डेटा प्रोसेसिंग प्राइवेट लिमिटेड- टी.डी.पी.एल आसेआ आयोजित म्तेहान शामिल न। रद्द कीते गेदे म्तेहानें च ड्रग इंस्पेक्टर, असिस्टेंट प्रोफेसर, डिप्टी कलेक्टर, दंदें दे डॉक्टर, असिस्टेंट इंजीनियर, सिविल जज, एडीशनल पब्लिक प्रॉसिक्यूटर ते फॉरेस्ट रेंज अधिकारी दी भर्थी लेई लैते गेदे म्तेहान शामिल न। सरकारी पॉलिटेक्निक च लेक्चरारें, वरिष्ठ वैज्ञानिक अधिकारी, सहायक जंगलात संरक्षक ते

होरनें दुए प्रशासनिक ते तकनीकी औहद्धें दे म्तेहान बी रद्द कीते गे न। झारखंड सरकार दी अधिसूचनाएं च आखेआ गेआ ऐ जे अनियमितता कन्ने जुड़े मामलें दी सुनवाई लेई हाईकोर्ट गी फास्ट-ट्रैक अदालत खड़ेने दी गुजारश कीती जाहग। वरिष्ठ आईएएस अधिकारी अमिताभ कौशल हुंदी अध्यक्षता आहली समिति द'उं म्हीनें अंदर अपनी रिपोर्ट जमा करोआग।

<><><><><><>

Satendra Jain -Arrest

दिल्ली सरकार दी भ्रष्टाचार निरोधक शाख - ए.सी.बी. ने आम आदमी पार्टी दे नेता ते दिल्ली दे साबका मंत्री सत्येंद्र कुमार जैन सने भारती प्रशासनिक सेवा दे अधिकारी ते दिल्ली जल बोर्ड दे साबका मुख कार्यकारी अधिकारी उदित प्रकाश राय ते च'उं होरनें आरोपिएं गी बी गिरफ्तार करी लैता ऐ। एह गिरफ्तारी दिल्ली जल बोर्ड दे सीवेज ट्रीटमेंट प्लांट यानि गंदे पानी गी साफ करने सरबन्धी संयंत्र गी अज्जै-कल्लै दे स्हाबै दा बनाने मतल्लक टेंडर प्रक्रिया च गड़बड़ी दे मामले च कीती गई ऐ। जांच च पता लग्गा ऐ जे टेंडर प्रक्रिया च हेरा-फेरी करने लेई किश गैर-सरकारी लोक सरकारी अधिकारियें ते बिचैलियें दे संपर्क च हे। इस मामले च पैसे दे लैन-देन कन्ने होई दी कमाई दी बी जांच कीती जा'रदी ऐ।

<><><><><><>

UAE -Iran

संयुक्त अरब अमीरात ने इलाके च बधदी तनोतनी ते इलाकाई ते अंतर्राष्ट्री सुरक्षा लेई खतरे गी दिक्खदे होई ईरान दे कन्ने हर चाल्ली दे बपारिक ते कारोबारी लैन-देन गी

स्थगित करी दिता ऐ। अमीरात दे बदेश मंत्रालय दी संचार सरबंधी डरेक्टर अफरा अल हमेली होरें दस्सेआ जे इस फैसले दा मकसद इलाकाई स्थिरता ते माली बवस्था गी अंतरराष्ट्री कनून ते वैश्विक मानकें मूजब बनाई रखना ऐ। अमीरात ने एह घोशणा ईरान दी तरफा खाड़ी च द'उं बैलिस्टिक मिसाइलां दागे जाने दे बाद कीती। हालांकि, अमीरात ने इब्बी आखेआ जे ओह शांति ते स्थिरता लेई गल्लबात, सहयोग ते इलाकाई अखंडता दे प्रति वचनें बज्जे दा ऐ। ईरान दे बदेश मंत्रालय दे प्रवक्ता ने अमीरात दे एकड़े दावे गी खारज कीता ऐ जे ईरान ने अमीरात आहली बक्खी कोई मिसाइल दागी ही। ईरान ने अमीरात दे आरोपें पर फिलहाल कोई टिप्पणी नेई कीती ऐ। हालांकि, ईरान ने चेतावनी दिती ऐ जे अमरीका दे कन्नै शांति समझौता होने तगर होर्मुज जल डमरू मध्य बंद रौहग।

<><><><><><>

Trump Iran

तोआई अमरीकी राष्ट्रपति डॉनाल्ड ट्रंप होरें ईरान दे कन्नै गल्लबात तदुं धोड़ी रोकने लेई आखेआ ऐ जिसलै तगर ईरान कुसै समझौते लेई तैयार नेई होई जंदा। अमरीकी प्रशासन ने एह फैसला नेह् समें च लैता ऐ जिसलै होर्मुज जल डमरू मध्य दी स्थिति ते दौनें मुख्यें दे बश्कार जारी तनोतनी गी लेइयै अमरीका ते ईरान आसेआ इक-दुए दे बरोध च बयान जारी कीते जा'रदे न। एहदे शा पैहले, कल श्री ट्रंप होरें आखेआ हा जे नौसैनिक नाकेबंदी जारी ऐ पर होर्मुज जलडमरूमध्य खुल्ला ऐ। दुई बक्खी, ईरानी संसद दे स्पीकर मोहम्मद बाघेरी गालीबाफ होरें आखेआ ऐ जे होर्मुज जलडमरूमध्य गी उसलै

धोड़ी फही नेईं खोलेआ जाहग जिसलै धोड़ी अमरीका 14-सूत्री समझौते दे वायदें गी पूरा नेईं करदा। इंदे च नाकेबंदी खत्म करना मुक्ख तौर पर शामिल ऐ।

<><><><><><>

Hockey World Cup

नीदरलैंडस च, खेड्ढे जा'रदे मर्दे दी हॉकी दे विश्व कप दे पूल-डी च, अज्ज भारत दा मुकाबला पाकिस्तान दे कन्नै होग। दौनों टीमैं लेई अगले दौर च जगह बनाने दे लेहाज कन्नै एह मुकाबला बड़ा गै महत्वपूर्ण ऐ। भारत ने हुनै धोड़ी द'उं मैचें च 3 अंक हासल कीते न ते अगले दौर च पुज्जने लेई भारत आस्तै अज्जै दा मैच घट्टोघट्ट ड्रॉ खेड्ढना लाज़मी ऐ। भारत ने हुनै तगर वेल्स पर जित दर्ज कीती ऐ जिसलै के इंग्लैंड दे हत्थें उसी हार दा सामना करना पेआ हा। पाकिस्तान दे द'उं मैचें च छड़ा इक गै अंक ऐ। दुई बक्खी इंग्लैंड ने पूल-डी च अपने दौनों मैच जित्तियै पैहले गै अगले दौर च थाह बनाई लैती दी ऐ।

<><><><><><>

Badminton

विश्व बैडमिंटन चैंम्पियनशिप च, कल नमीं दिल्ली च भारती खड्ढारिणं शानदार जित्त दर्ज कीती। मर्दे दे सिंगल्स च लक्ष्य सेन ने पैहले दौर च ऑस्ट्रिया दे कॉलिन फिलिमोन गी हराया जिसलै के दुई बक्खी तृषा जॉली ते गायत्री गोपीचंद दी भारती जोड़ी ने प्री-क्वार्टर फाइनल च अपनी थाहर पक्की करी लैती ऐ।

<><><><><><>

Football

इरंड कप फुटबॉल दे पैहले सेमीफाइनल च, अज्ज कोलकाता च, ईस्ट बंगाल दा मुकाबला स्पोर्टिंग क्लब दिल्ली कन्नै होग। एह मैच संझां 7 बजे थमां खेड्ढआ जाना ऐ। इस मुकाबले दी जेत् टीम इरंड कप दे फाइनल च पुज्जी जाहग।

<><><><><><>

Cricket

मर्दे दे क्रिकेट च मेजबान श्रीलंका अज्ज श्रीलंका दे Galle International स्टेडियम च भारत खलाफ मजूदा श्रंखला दे पैहले टैस्ट मैच दे अज्ज 5में दिन अपनी दुई पारी गी कल दे 84 रन्ज पर 4 विकेट दे स्कोर थमां अग्गे शुरु करोग। श्रीलंका गी अर्जे जित लेई होर 288 रन्ज बनाने होगंन ते ओदे 4 खड्ढारी आउट होई गेदे न।

<><><><><><>

Fishermen Rescued

भारती तटरक्षक बल दे दमन Air Station ने डुब्बा रदी बेहड़ी च फसे दे 9 मच्छेरे दी जान बचाने लेई फौरी तौर पर अभियान चलाया। अधिकारिक जारी प्रेस विज्ञप्ति मताबक स्टेशन गी मसीबत च फसे दे मच्छेरे कोला मदद दा स्नेहा मिलदे सारे गै इक चेतक हेलिकाप्टर गी फौरन घटना आहली थाहर आस्तै भेजी दिता गेआ।

<><><><><><>